

四庫全書

史部

欽定四庫全書

禮部志稿卷八十八

明 俞汝楫 編

祥異備考

表奏祥異

有司表奏灾祥

洪武二年九月禮部尚書崔亮等奏凡祥瑞應見皆為國家休徵按唐六典四瑞有大瑞上瑞中瑞小瑞其大

瑞景星慶雲麟鳳龜龍之類上瑞白狼白兔之類中瑞
蒼烏朱鴈之類小瑞嘉禾芝草連理枝之類又按唐令
凡祥瑞應若麟鳳龜龍之類依圖書合大瑞者所司隨
即表奏百僚詣闕上表奏賀告廟頒下其餘諸瑞並令
所司轉申以聞若鳥獸之類有生獲以獻者仍遂其本
性放之山野亦有不可致者如連理枝之類則不須齎
送今擬凡祥瑞應見若麟鳳龜龍之類合大瑞者許各
處表奏不得泛言虛飾以惑上聽其餘諸瑞所在官司

驗實圖進上曰卿等所議但及祥瑞而不及災異不知
災異之來乃上天垂誠所係尤重今後四方或有災異
無論大小皆令有司即時飛奏

表賀日食不見

永樂二年六月朔日有食之是日陰雲不見禮部尚書
鄭賜等言此聖德所感召請明日率百官表賀上曰正朕
恐懼脩身之際何可賀對曰宋盛時有行之者矣上曰
於此一方陰雲不見天下至大他處見者多矣且陰陽

家言曰食而陰雲不見者水將為災以此言之可賀乎
乃止

奏祥

奏黃河清

正統二年十一月總督漕運都督僉事王愉等奏驗視
得清河等縣老人康守中等所言淮河清澈已踰一月
是實事下行在禮部尚書胡濙等以為禎祥率百官稱
賀上不允

山川壇醴泉

景泰二年南京總督機務兵部尚書靖遠伯王驥等奏
正月十八日山川壇开醴泉迸出馨香上聞臣等躬詣
汲取祇薦奉先殿以昭聖世之祥事下禮部尚書胡濙等
以為此蓋皇上聖德上答天心是以嘉祥協應文武百
官理宜上表稱賀第先奉詔書敢有獻言祥瑞以事詔
諛者罪之以此未敢輒行命免賀

奏甘露降

嘉靖七年提督南贛右副都御史汪鉉奏是年元日甘露降於福建長汀泰龍等縣上曰覽奏以甘露呈瑞為朕仁孝感格之徵夫豈敢當朕非好祥瑞然天意所至人不敢違朕惟奉天求庇民物以答靈貺所進甘露敬當薦之祖廟其賜鉉白金文幣奏內諸生父老行有司給賞

日當食不食

嘉靖三十八年七月朔日食一分五杪例免救護禮部

尚書袁煒言臣聞唐一行曰日君道也無朏魄之變古
之太平日有不食或月變行而避之或五星潛在其下
禦侮而救之或涉交數淺或在陽度陽盛陰微則不食
或德之休明而有小青焉則天為之隱雖交而不食此
四者皆德教之所繇生也皇上以父事天以兄事日羣
陰退伏萬象輝華是以日位旺榮陰氛消鑠食止一分
與不食同臣等不任懽忭上以為然

獻瑞

句容嘉瓜同蒂

洪武五年句容縣民獻嘉瓜同蒂而生上御武樓中書省臣率百官以進禮部尚書陶凱奏曰陛下臨御同蒂之瓜生於句容句容陛下祖鄉實為禎祥蓋繇聖德和同國家協慶故雙瓜連蒂之瑞獨見於此以彰陛下保民愛物之仁非偶然者上曰草木之瑞如嘉禾並蓮合歡連理兩歧之麥同蒂之瓜皆是也卿等以此歸德於朕朕否德不敢當之縱使朕有德天必不以一物之禎祥

示之苟有微過必垂象以譴告使朕克謹其身保民不
至於禍殃且草木之祥生於其土亦惟其土之人應之
於朕何預若盡天地間時和歲豐乃王者之禎故王禎
不在於微物遂為贊賜其民錢千二百

却表賀異物之獻

宣德元年行在禮部尚書胡濙以山西進龍馬駒請偕
羣臣上表賀上曰二三年間水旱告災繼踵而來朕方
日夕惕勵一獸之異何救民饑而欲表賀其止之

獻白兔

天順二年河南守禦永寧縣百戶所總旌金聲獻白兔
禮部以為瑞物請給重賞上曰白兔不過以供玩耳非
瑞也其給與鈔為路費

郊壇松柏甘露

成化六年正月掌太常寺禮部尚書李希安等奏伏
見天地壇外松柏樹葉自本月初七日至初十日有甘
露降其凝如脂其味如飴謹稽載籍有曰聖王之德上

及太清下及太寧中及萬靈則膏露呈瑞今當皇上
郊祀之時降於郊祀之所此實聖德格天和風協應萬
萬年太平之休徵也上覽奏付所司知之

嘉瓜繪圖以聞

嘉靖十年廣本府曲周縣產嘉瓜並蒂者二瓜中更
生枝蔓者一縣丞侯庭訓繪圖以聞上奇之以示禮
部以為本枝繁衍之兆上乃親獻內殿賜廷訓衣一襲

藩王獻瑞穀

嘉靖三十年鄭府廬江王祐梈獻境內所產瑞穀一莖
五穗者一本三穗者三二穗者六十詔擇吉獻廟禮部
請率百官以次日詣奉天門賀不許再請乃許之

獻白兔白鹿

嘉靖十一年四川撫臣宋滄獲白兔於梁山縣以獻
禮部尚書夏言等請獻之太廟呈於兩宮太后前百
官表賀上曰茲兔希有良繇和氣所感而忠臣賢士
推為王瑞此在我祖宗與古帝王可以當之朕以菲薄

安可受賀疏再上從之

嘉靖十二年正月河南巡撫都御史吳山獲白鹿於靈寶縣以獻禮部尚書夏言請告太廟世廟百官表賀上諭令擇日告獻併呈於兩宮皇太后不必表賀固請乃許之

嘉靖十二年四月巡撫應天都御史陳軾得白兔於無錫縣以獻上曰白鵲鹿兔屢行獻賀自後有疊至重出者不必舉獻賀之禮禮部宜明示天下果非正瑞者

勿來獻于是尚書汪鉉作書三章美上謙冲之德上褒答焉

獻芝龜

嘉靖三十八年總督浙直福建軍務尚書胡宗憲獻芝草五白龜二上悅名龜曰玉龜芝曰仙芝賜宗憲銀五十兩金鶴衣一襲禮部因請謝玄告廟許之巡撫陝西都御史程軌巡按陝西御史李秋疏獻白鹿芝草各一云得之部內書堂山萬壽宮中上以玄祥疊至歸恩

天眷賜軌等各綵幣二表裏鈔二千貫於是禮部疏
請謝玄告廟許之

嘉靖四十年四月瑞兔生子二六月又生子四七月又
瑞兔各生二子上以玄恩垂示延生之祥特為罕遇又
於孟秋既望應朕生辰命駙馬謝諮告太廟百官表賀
至四十三年又瑞鹿生二子

非正瑞勿報

嘉靖十三年三月禮部題議巡撫應天都御史陳軾奏

據無錫縣民呂大方稱於莊舍讀書獲一白兔轉送到官隨行委官馳獻聞府郡公卿觀者動色都城士庶見者改容僉謂希世之珍聖王之瑞也臣因考之瑞應圖曰王者恩加耆老則白兔見抱朴子曰兔壽千歲滿日則色白崔豹古今注曰漢建平年山陽得白兔目赤如朱故歷代以來貢獻有疏歸美有頌闡揚有賦歌詠有詩蓋以彰天地之靈異表帝王之休徵也恭惟聖皇御極至德通玄仁恩被民和氣育物正名定分而道

協百王親賢遠姦而明見萬里故茲瑞兔之應允符治
化之祥前已產於蜀中今復見於吳下素毫潔皎如玉
之輝朱目晶熒如丹之渥生逢聖世恍在舜廷馴擾王
畿即同文圓是誠聖壽無疆之慶太平有象之徵也
昔成周之時越裳重譯而獻白雉載在史冊古今以
為美談畿輔伊邇竒兔效珍有邁越裳之雉者臣觀
物騰歡不勝踴躍仰天稱賀莫罄揄揚為此謹將白
兔進獻等因抄呈到部臣等仰惟皇上德懋中和效

臻位育大化達於兩間至仁浹於九有繇是協氣充塞
靈物滋蕃所以白兔白鵲白鹿之瑞接踵而至但前此
四川貢至白兔已經呈獻太廟世廟呈覽兩宮太后文
武百官具表稱賀今該本官進到白兔雖產在東吳與
西蜀所獻同係希珍瑰瑋所據一瑞再見尤足以表嘉
祥慶集之休茲欲仍復舉行前典但恐事神則近於繁
禮稱慶則嫌於同辭臣等雖欣躍倍常而不敢以彌文
具請臣等竊惟自古符瑞並臻皆由應德而至陛下德

及太清道合無疆況將來瑞應之見日月不絕載於史
官將不勝紀臣等議得今後四方有所貢獻凡係創見
特出之瑞俱當呈獻宗廟兩宮百官表賀以昭皇上聖
德格天之徵其係一物而再至屢至以行獻賀者俱各
欽遵昨奉聖旨進留內苑簡遴園人珍重飼養以祇承
天貺庶幽明上下之間天人感應之際禮文不瀆而歡
欣交通矣奉聖旨鵲鹿兔已屢行獻賀之禮今後或有
重至不必復舉行兩部裏還通行天下果非正瑞自至

者勿報欽此

奏異

四方日報災異

弘治八年禮部尚書倪岳等奏比者四方日報災異地震至有聲雨雹至於殺人四月嚴霜至於殺穀而湖廣長沙草木之妖菜發異花樹生異實皆世所不常見之灾恐致人所不能測之變

弘治九年禮部尚書徐瓊等奏自去年八月至立冬後

江西建昌等府人多瘟疫貴州陝西地震廣東颶風大
雨水海潮決崩隄岸陝西天鼓鳴四川彭水縣十二月
雷電雪湖廣長沙縣雨雪雷電江西南昌府大雷雨
雪今年正月至五月陝西山西遼東江西南北直隸宣
府俱地震四川長寧縣楠樹上生蓮花李樹上生荳莢
陝西流星如月山西武鄉縣四月隕霜屯雷縣五月雨
水電山東大風拔木臣等考之傳記天鼓鳴或以為兵
革歲動地震或以為陰勝陽微兵興民勞流星如月或

以為兵大起下有戰場四月隕霜或以為誅不原情刑
罰妄行至於嚴冬雨雪雷電乃陰陽之失節而楠木李
木生蓮花荳莢實草木之妖是皆天地萬物變異之大者

雲南極異

弘治十六年禮部題該巡撫雲南都御史陳金奏弘治
十五年正月十九日以後雲霧黑暗不辨人形晝夜不
別者凡七日又隴川宣撫司十月大雨雪大者如手掌
小者如雞卵盡殺田禾十六年正月十八日宜良地再

震有聲如雷搖動房屋二月初三日宜良復黑氣迷空
咫尺不辨人形狂風晝夜不息地中雷隱隱有聲又正
月至二月曲靖火發者七次燬軍民房屋甚衆請修省
并祭告雲南山川

山陝京師之異

弘治十年三月禮部奏邇者山西陝西天鳴地震星隕
京師去冬恒燠無雪火災疊見今奏狂風陰霾日精無
光山東以南亢陽為虐二麥無成請通行內外諸司省

金匱要略卷八十八
躬思咎勉盡職務仍遣大臣祭告天地社稷山川及在外諸司各禱於封內山川

類奏災異

弘治十年禮部尚書徐瓊等以靖寧宮災上疏言今歲正月以來貴州安南衛等處火災延燒千餘家焚死百餘人江西南昌縣等處暴雨大風火災直隸壽州河南汝寧府等處雨冰雹傷稼擊死人畜大風拔木山西陝西地震天鼓鳴黑霧四塞直隸蘇州府等處池港

水溢臣等常考之傳記火災者上不節下不儉之應又
火災之發皆以臺榭宮室為戒至於地震天鳴震雷冰
雹皆變之大者

類奏災異

嘉靖十二年禮部奏今年四方災異地震八星隕有聲
三天鼓鳴一雷震殺人一火災一山東平山衛民家牛
生犢身有文前兩足及尾皆成鱗甲中皆毳毛貴州安
南衛民家生一男兩頭四手四足奏上報聞

類奏災異

嘉靖二年禮部類奏四方災異天鼓鳴五地震六十三
星隕八冰雹十一火六氣二雪寒二雷擊者三山崩三
水溢八產妖二疫一

奏地震

嘉靖四十年十二月禮部類奏今年天下災異言地震
無數或一日而震數省或一處而震數次甚至土裂沙
湧房屋搖塌人民死傷無數變不虛生咎在臣等請行

內外大小臣工齊沐修省深思隱微勤修職業以回天意
祈禱備考

省災

減膳禱雨

吳元年戊辰大雨先是上因久旱日減膳素食宮中皆
然俟天雨復膳既而雨羣臣請復膳上曰亢旱為災實
吾不德所致今雖得雨然苗稼焦損必多縱肉食奚能
甘味廷臣進對曰昔武王克商屢獲豐年詩人頌之曰

綏萬邦屢豐年主上平海內拯生靈上順天心下慰民望而憂勤惕勵感茲甘雨豐年之祥其有兆矣上曰人事邇天道遠得於民心則得乎天心今欲弭災但常謹於修己誠於愛民乃可答天之眷乃詔免今年田租

郊祀儆戒

吳元年十月丙申上御戟門與侍臣論及郊祀因言慕容超郊祀之時有赤鼠大如馬之異大史成公綏占之以為信用姦佞殺害賢良賦役繁重所致是則妖孽之

召實錄人與我常以此自儆如公孫五樓之輩余安肯
用之起居注熊鼎等頓首曰慕容超信用奸佞故賢退
而奸附之今主上明聖所用皆賢良公孫五樓之徒何
從至哉上曰汝等宜勉之苟有所見毋隱者

以減膳省愆祭告

洪武二年上以旱災相仍因念微時艱苦乃減膳省愆
祭告皇考仁祖淳皇帝皇妣仁皇后惟曰祖宗積德百靈
佑助戡定禍亂上帝命為天下生民主任以司牧使厚

民生惟恐弗勝日懷憂懼伏見去年四方旱災民命顛危今春風雨不時豐荒未卜因念徵時皇考皇妣凶年艱食取草之可茹者糴米以炊艱難困苦何敢忘之今富有四海而遭時若此咎實在兒生民何辜因具草蔬糲飯與妻妾共食旬日以同民艱以答天譴敢告知之

弭災不以禱祠

正統六年六月行在禮部尚書胡濙等言今年四月以來亢暘不雨蝗蝻為患揆之天意驗諸人事皆由臣下

才德疎庸政事缺少有非陰陽之和所致乞令文武百官自本月初七日為始齋沐思過仍令大臣於在京各神廟行香及下道錄司慎選道流盡誠祈禱庶幾少回天意上曰應天以實不以文今上天降災在修德以弭之豈區區祈祠所能免也不必行

雨雹修省

天順元年六月是日清霽酉刻大風雷雨驟從西北來發樹壞屋須臾雨雹大如雞彈至地經時不化奉天門

東吻牌推毀欽天監奏電者陰協陽也盛陽雨冰氣熱而陰協之則轉為電占書曰凡雨電所起必有愁怨不平之事伏乞皇上謹遵天戒修省寬恤天下刑獄

修省釋宮人

天順八年三月大學士李賢等言天時有未和者蓋由陰氣太盛所致也自宣德至天順間選取宮人數多其中不無嗟怨有傷和氣乞特賜簡閱留其有職務及不願出者其餘悉出并浣衣局婦女皆釋放寧家此實前

代聖帝明王盛德之舉上曰卿言合朕意其亟行之於是放出宮人中外欣悅

地震連十六日

成化元年禮部言河南鈞州奏於是年四月初八日至二十三日連十有六日地震有聲謹按春秋傳地道以安靜為體若陽迫於陰而不能升則地為之動動則為變為異況數動而有聲是為變異之甚也咎在守土之官乞令有司嚴加修省撫卹軍民防護城池修明政事

以消災咎從之

地震祭告

成化二年四月禮部奏四川鹽井衛所屬沿邊寧夷等堡及黑白二鹽井馬刺長官司直抵瀘州屯自去年六月至今晝夜地震不時共計三百七十五次而十二月十四日夜震尤甚壞城垣房屋數多沿邊軍民驚疑不安請勅戒諭鎮守總兵巡撫并三司等官上從之仍命遣行人齎香帛祝文祭告境內山川之神以禳災咎

弭災行實惠

成化九年四月總督河道刑部左侍郎王恕奏去年自京師直抵揚州南北三千餘里水旱災傷民甚艱食今歲雨雪少降狂風彌月土乾麥槁民不聊生三月初四日天暗如夜乞詔廷臣講究所以弭災恤患之策并祭告各處山川之神上曰山東既災重民艱須行實惠今年稅糧盡行蠲免順天等府亦量減免於是特遣禮部左侍郎劉吉往祭告東岳泰山等神以祈雨澤

星變

成化十五年九月福建建寧府有大星自西南流東北有聲如雷奏至禮部臣言考之傳記流星大者有聲如雷有光如火其光所至其地有災宜移文所司痛加警省以安人心銷天變從之

地動省

成化十六年禮部以三月初十日南京及江北四府山東之兗州河南開封府州縣俱同時地震有聲房屋搖

撼人心驚懼奏言考之傳記地動千里有大災又云春時動者歲凶二月動者水災今所動不止千里又況鳳陽南京皆祖宗根本之地祖宗社稷所在關係尤重乞行各處守臣清理冤抑存恤孤寡有利必興有害必去務施德澤以消變異又必廣儲畜省費用以備歲凶濟河渠築河堤以防水患毋徒事虛文從之

省京城濫火

弘治四年欽天監監正吳昊奏北京城火災為患踰旬

不息謹按占書名曰濫火乃法律政事不修之証又以
示時俗虛偽侈靡之戒伏望皇上修省弭災無事虛
文則可以回天意安人心矣命下其言於禮部

請講求修省

弘治元年四月禮部尚書周洪謨等言天壽山雷電風
雹各陵樓殿厨亭并各監廳屋瓦獸角擊碎甚多臣等
以為災不於他所而於祖宗陵寢之地不於他時而於
茂陵上完之初伏望陛下延訪明德講求治理謹致災

之由究弭災之道仍勅兩京文武羣臣同加修省

弘治六年八月禮部尚書倪岳等言日者雷電交作
雨電驟至大如彈丸小如栗棗平地壅積人皆驚駭如
此災異不於他所而於京畿之內不於他時而於秋成
之際春秋書大雨電傳曰聖人在上無電雖有不為災
書大言為災也況今年自春及秋亢暘為災蝗蟲大作
而河南山東并直隸大名等府俱各靈雨過時河流潰
溢田禾淹沒人民流移實在臣等不職所致然竊念上

天仁愛所以儆告於皇上者亦未必無意伏望仰答天心益加寅畏深求致災之由如恤民矣而或征求之未息寬刑矣而或枉抑之未伸節財矣而或侈費之未除任賢矣而或倖門之未杜聖學勤矣而或未免於作輟言路開矣而或未盡於聽納或讒邪肆行或羣小冗進凡此有違乎天意無一不可以致災仍勅兩京文武羣臣協力祇承痛加修省庶天意可回和氣協應

省災致告

正德元年九月禮科都給事中周璽言日者靈雨方霽
星變繼作皆陽微陰盛之象請親君子遠小人修政事
攘夷狄絕近倖之侵權黜奸貪之蠹國延訪輔臣及九
卿以求理亂之幾務盡修省之實上曰星變事重所司
即著詳以聞禮部覆奏人君之心與天流通願陛下引
咎責躬總攬乾綱敬修人事如璽所言仍卜日遣官祭
告天地宗廟社稷使精誠感格上下交通則和氣充塞
星變可消上是之乃命英國公張懋駙馬都督蔡震惠

安伯張偉分行祭告

請祭天變

正德元年六月禮部尚書張昇等言天人一理人事失
於下則天變應於上茲有風雷雨雹非常之變內震西
中門脊柱外傷天地壇門闌樹木夫西中門乃禁密要
途天地壇乃明禋重地而風雷乃天之號令也於此震
驚其可忽乎詩云敬天之怒無敢戲豫敬天之渝無敢
馳驅戲豫若鷹犬弋獵歌舞遊宴之類馳驅若騎射馳

驟出入無時之類是已帝舜曰勅天之命惟時惟幾惟時則無時而不戒勅何暇於戲豫惟事則無事而不戒勅何暇於馳驅伏望謹詩人戲豫馳驅之戒法大舜惟時惟幾之勤端居內省講學修德親賢遠奸審於舉措朝夕精思何以致此且今府藏空虛生民困苦亟宜惜財恤下不可濫賞輕費請廣開言路俯賜優容仍勅諸司同加修省振舉職務撫輯軍民沿邊守臣訓練軍馬修省武備謹防奸宄保固疆宇庶人事盡而天變可回也

請省地震

正德七年五月巡按雲南監察御史張羽言雲南地震甚於他省郡縣官多不得人雖常按治其罪而荒裔之外吏政尚同乞勅巡撫三司等官痛加修省以弭災異禮部尚書傅珪等覆以古之帝王遇災而懼故能轉禍為福今歲天鼓鳴流星見陰霾四起天雨黃沙火災異常盜賊猖獗而且地屢震不特雲南一方而已前此常發給音修省及今和氣未臻災變滋甚宜推羽言通行

在京文武衙門并在外鎮巡司府等官令其思咎勉盡
職業其有利可興弊可革者開具上陳

乞修省文實兼盡

正德八年禮部尚書傅珪等疏列四方災異且曰春秋
二百四十二年所書災異不過六十九事今自去年秋
九月至夏四月地震天鳴雹降星隕龍虎出現山崩地
裂共四十有二而旱災不與焉頃雖雨降詔旨修省祭
告而雨澤未通禾苗枯槁民命國計不可不憂伏望勵

精更化動繇禮法更勅内外文武羣臣省躬補過勤恤
民憂愛養軍士凡冤抑不伸祈請太濫者不分疎遠貴
近一裁以法再令擇日齋戒祭告上下交修文實兼盡
如此而民心不安天意不回災變不消雨澤不降者無
是理也

省覽奏報天象

嘉靖元年欽天監刺漏博士杜鉞言正德以來逆瑾擅
專壅惑主聽時五官監候楊源夏祚並以奏報天象被

杖有至死者自後臺官多為全身保妻子之計匿不以聞今皇上聖明克謹天戒宜勅本監諸臣敬乃有事凡遇天象示異如頃者雷聲連延水電率變五星休旺風不應時之類一一占奏無隱天象錄無拘年終之例每季類進一帙置之丹宸以便省覽其於祈天永命之道不無少補疏入下禮部看詳

極異加省

嘉靖五年十月禮部言四方災異臣等歷考史籍未有

如今日者冰雹害稼大如雞卵如杯碟則有之其大如碗似人頭古未有也其捲掣廟宇及民舍百數十家萬無踪跡又再三現于一鎮古未有也婦人怪胎生子三目或四目及形體不全者古則有之至六目四面有角手足各一節獨爪鬼聲古未有也牛犢之產一身二首者古則有之其一身二首腹內心肺與膽各二且二三月間兩省並見古未有也虎入城市入民家猛惡噬人者古則有之其具人手足出沒倏忽不可防制古未有

也其餘山崩水漲烈火迅雷霖雨亢暘傷人害物其禍尤慘災不妄興必有所召臣等查得往年遇有災異不過齋戒祭告貶損服色而已原天意所以示警豈徒欲責取文具為哉臣願上下協和痛加修省期於舍舊圖新盡人事以回天意除齋戒祭告外大小臣工凡係利害興革事宜逐一議擬奏請而皇上虛心聽納即賜施行如救焚拯溺汲汲不暇使官守言責各盡其職膏澤下於民一洗因循玩愒之習上曰災變非常朕甚驚惕

諸司以實痛加修省母事虛文其利弊興革事宜會官
議以聞

省日月交食

隆慶四年正月朔日食翌月食先是工科給事中陳吾
德言歲首日月交食天之大變而百官護日多情慢不
如禮宜令禮官先於月食前一日承式戒飭之而皇上
亦宜罷遊樂屏玩好以答天戒則大小臣工將明知聖
意所嚮罔不寅恭兢惕以修庶政矣上是其言

祈禱

祈禱災祥

凡祈禱雨雪及時禮部奏行順天府於都城隍等廟行香禁屠宰三日百官公所致齋青衣角帶辦事

凡各處雨澤有無乾溢需足以報禮部

凡各處地震山川異常雨暘愆期奏至禮部年終類奏行在京諸司及南京禮部并被災地方修省

不雨告祭

洪武二年上以春久不雨告祭風雲雷雨嶽鎮海瀆山川城隍旗纛諸神中設風雲雷雨五嶽五鎮四海四瀆凡五壇東設鍾山雨淮江西雨廣海南海北山東燕南燕薊山川旗纛諸神中設風雲雷雨凡七壇西則江東兩浙福建湖廣荆襄河南河北東華州京都城隍凡六壇共一十八壇中五壇奠帛初獻上親行禮兩廡命官分獻每壇牲用犢羊豕各一幣則太歲風雲雷雨用白餘各隨其方色籩豆簋簠視社稷登一實以太羹鉶

二實以和羹其餘同常祭祀文曰朕代前王統世治
教民生當去歲紀年建號之初首值天下災旱中原人
民苦殃尤甚今年自孟春得雨之後仲春再霑微雨至
今又無雖未妨農務之急而氣候終未調順伏念去歲
因旱民多顛危今又缺雨民生何賴實切憂惶夙夜靜
思惟天地好生必不使下民至於失所然神無人何以
享人無神何以祀朕不敢煩瀆天地惟衆神主司下土
民物參贊天地化育伏願神以民庶之疾苦哀聞於上

天厚地乞賜時雨以成歲豐養育民物各遂其生朕
敢不知報尚享

親禱山川壇

洪武三年六月戊午朔先是天久不雨上謂中書省臣
曰君天下者不可一日無民養民者不可一日無食
食之所恃在農農之所望在歲今仲夏不雨實為農
憂禱祀之事禮所不廢朕已擇六月朔日詣山川壇躬
為禱之爾中書各官其代告諸祠且命皇后與諸妃親

執業為昔日農夫之食令太子諸王躬饋於齋所至是
日四鼓上素服草履徒步出詣山川壇設業席露坐晝
曝於日頃刻不移夜卧於地衣服不解皇太子捧楹
進蔬食雜麻飯菽粟凡三日庚申暮還宮仍齋宿於西
廡

洪武五年戊午夏至祭皇地祇於方丘禮畢駕還乾清
清皇后妃嬪見上曰方農時天久不雨秧苗尚未入土
朕念民之失望也甚憂之汝等宜皆蔬食自今日始俟

卷八十八
雨澤降復常膳如故於是宮中自后妃而下皆蔬食
是夜大雨詰旦水深尺餘

禱雨封龍神

洪熙元年以久旱得雨封大青龍神為弘濟大青龍神
小青龍神為靈顯小青龍神賜名所居山為翠微山命
禮部歲以春秋仲月遣順天府官致祭遂遣成國公朱
勇諭祭神曰朕睽睽一念憂憫黎庶今東作之初雨澤
不降春耕不遂何以粒民爰禱於神以祈甘霈曾不踰

日雨及公私神之福民厥功烜赫今特封大青龍為弘濟大青龍神小青龍為靈顯小青龍神賜龍所居山名曰翠微山以彰神靈仍勅有司春秋致祭著為常典尚其益弘顯化永福兆民益平則門外三十里廬師山有潭世傳有大小二青龍出沒不時遇旱致禱輒雨及是久不雨命劉淵然等禱皆不應遂即親禱焉雨隨注故有是命

禁非理祈禱

成化五年六科給事中劾奏道錄司左玄義許祖銘奏
勅祈雪穢言懟天仗劍斬風褻天慢神莫此為甚乞將
祖銘明正典刑以謝神人之怒及乞勅禮部禁約各觀
道士不許擅自祈禱以褻神明庶天可回而雪澤自降
矣疏入上曰許祖銘祈禱不誠非理妄為本當逮治今
姑宥之自後再犯不宥

祈雪祭告

正德十年乙丑以冬無雪遣定國公徐光祚會昌侯孫

銘新寧伯譚祐禮部尚書毛紀祭告天地社稷及山川
城隍之神

親行祈雪禮

嘉靖二十八年上諭禮部深冬不雪二麥何滋今朕親
祈洪應壇百官青衣辦事勿慢朝天等宮廟各用素饌
遣文武大臣溶總檄詔邦謨行禮如例

祈雨雪告祭

景泰元年以天久不雨雪分遣大臣於京都各祠廟寺

觀祈禱從太子太傅禮部尚書胡濙奏請也安遠侯
柳溥祭昊天上帝后土皇地祇寧陽侯陳懋祭宗廟
禮部尚書胡濙祭大社大稷成安侯郭晟祭山川駙馬
都尉薛桓祭孝陵戶部左侍郎項文曜祭獻陵太常寺
卿蔣守約祭景陵其文曰叨承大統負荷維艱爰積愆
尤增茲災異狂寇肆逆既犯禁於三陵旱魃餘殃復妨
農於千里沉雨水示南甸之警致晨昏懷內省之憂悔
謝無由於原有自寅申祭告恭候帡幪

祭告祈雨澤

成化六年五月遣太常寺事禮部尚書李希安往山東祭告東嶽泰山東鎮沂山東海諸神祈禱雨澤以山東亢旱運河水竭從禮部請也

祈禱祭告

成化六年十二月禮部以冬深無雪奏請遣大臣致禱乃命武靖侯趙輔祭告山川之神禮科都給事中霍貴等言周禮荒政十二有曰索鬼神雲漢之詩亦曰靡神

不舉蓋自古帝王遇災戒懼未嘗不以祈禱為事今歲畿內水澇致厯聖慮大發倉廩以濟之邇因三冬無雪又遣大臣祭告山川等神其敬天仁民之心無所不至但四方之地廣於京畿設或明年復然將何所處乞申勅百司痛加修省仍照例遣官徧禱四方名山大川以祈神休庶雨暘時若而豐穰可期詔下其言於禮部禮部覆奏今年湖廣等處地震并山東旱災已遣尚書李希安等祭告東嶽泰山并南嶽衡山及河南布政

司官祭告中嶽嵩山等神明年正月十三日大祀在
邇天下名山大川嶽鎮海瀆之神俱在祭列宜免行偏
禱惟順天等府水滂為甚乞命官二員祭北嶽恒山并
北鎮鑒無閭山之神以祈豐順仍行在京文武官員嚴
加修省務竭忠誠以答天意詔可於是遣禮部右侍郎
邢讓祭恒山太常寺卿萬祺祭鑒無閭山

祈雪祭告

成化十九年十二月上以一冬無雪命禮部以本月初

十日為始致齋三日仍禁屠宰遣英國公張懋等祭告
天地社稷山川定西侯蔣琬等行香於各宮觀寺廟

宸斷禱雪祀

嘉靖十七年四月自正月至於是不雨命有司竭誠
祈禱賑恤郊外流民是夕上諭輔臣曰近因多旱朕方
以為憂禮部已請所司致禱矣又聞近郊小民踣斃心
加憂之朕處人上罪在朕躬即以十八日為始與卿等
齋心潔慮禁屠宰青衣辦事二十一日朕躬禱郊雩令

嵩示羣臣知之毋忽於是禮部具上先年定擬雩祀全儀上曰茲禱甘澤乃修省事祇宜青衣上香進帛三獻八拜成禮百官陪拜未可用所開全儀亦不必奉祖配祭用酒果脯醢牛一以熟薦

禳災

災變祭告

成化四年上諭禮部曰天久不雨兼之連日風霾朕心憂懼其以來月十八日為始致齋三日以答天譴仍禁

屠宰三日禮部請遣大臣一員祭告山川之神因言湖廣江西四川河南山東浙江直隸等處雨暘不時多有災咎宜差人各賫香祝遣彼處巡撫布政知府等官祈告嶽鎮海瀆及各境內山川之神上從之遣英國張懋祭告山川遣各堂上官分詣京城寺觀廟宇行香

地震祭告

成化六年正月以湖廣地震遣官祭告境內山川禮部尚書鄒幹言地道以安靜為體陰盛而反常則震去年

十二月十二日武昌等府同日地震宜移文湖廣巡撫等官并司府州縣嚴加修省用心操練軍士撫安流民及行翰林院撰祭文太常寺領香帛遣行人一員祭告南嶽衡山并令各府正官祭告境內山川城隍之神務極誠敬以禳災咎從之

災疫祭告

成化七年禮部以災疫流行請令大臣祈禳上遣襄城侯李瑾禮部尚書鄒幹掌太常寺李希安祭告山川等

神禮部奏南京江東門外江水泛溢崩頽北岸損壞民居請遣南京守備成國公朱儀祭告江神從之

泰山動搖祭告

成化二十一年禮部奏近兩廣山東陝西京畿地俱震而泰山五嶽之宗一二月間動搖者四災尤異常宜特降香幣命巡撫山東都御史詣泰山祭告以祈神貺安人心制可

災異遣禱

弘治十年三月禮部奏邇者山西陝西天鳴地震星隕
京師去冬烜燠無雪火災疊見今春狂風陰霾日精無
光山東以南亢暘為虐二麥無成請通行內外諸司省
躬思咎勉盡職務仍遣大臣祭告天地社稷山川及在
外諸司各禱於封內山川

宗廟災祭告

嘉靖三十年四月夜宗廟災成廟仁廟二主燬上哀痛
不能自勝明日文武百官各疏奉慰禮部疏請上親告

祭內殿以慰神靈復引過奏祭上帝以謝譴告青服御
西角門延見羣臣以共謹天戒下哀痛之詔以安人心
行天下宗室共知脩省以盡一體之誠勅內外臣工痛
加尅責以盡交修省之儆文武羣臣有奸欺負國蠹政
殃民者聽言官指實奏劾九卿堂上官及各衙門四品
以上令各自陳科道極言時政得失賜采納暫罷內外
一切工作蓄財力以圖修治奏入上曰宗廟災燬無前
大變即齋戒擇吉奏謝南北郊祭告景神殿大社稷俱

朕躬行遣官祭告朝日夕月等神陳言時政言官常職何待災變一切工程除欽安殿就緒外並令停止奏謝畢次日御門視事如故皇祖列聖主暫奏安於景神殿成仁二廟神主所司亟為恭製詣陵奉題還安各廟儀物即行補造

殿災祭告

嘉靖三十六年四月奉天等殿門災是日申刻雷雨大作至戌火光驟起初由奉天殿延燒華蓋謹身二殿文

武二樓奉天左順右順午門及午門外左右廊盡燬至
次日辰刻始息上大懼明日文武大臣奉慰上報曰上
天垂變朕戰懼若涉大淵莫知所措無前火災何以飾
辭禮部尚書吳山等以殿災請擇日遣官奉告郊廟社
稷及秩祀神祇以謝譴示勅下文武百官省愆引咎素
服辦事務修實政毋事虛文其兩京四品以上大臣循
例自陳科道官務直言時政缺失仍詔示天下及各宗
室一體修省上曰奏祭謝罪即擇吉行命公希忠溶延

德恭代秩祀神祇聞具來行下詔罪已告諸宗室如擬
行致災本朕何令自陳有懷必吐自盡其忠豈特今日
修省儀文至祭祀次日止

省災祭告

嘉靖四十三年三月上諭禮部臣曰旱危以見土雨風
霾不至其示所司以明日致齋始二十五日告南郊二
十四日告朝天等六宮廟遣定國公徐延德等各行禮
是日天陰雨忽霽大風揚塵上復諭禮部曰今旱固未

如前歲風塵土雨災疫過之其令所司申嚴祈禱各青衣致齋如修省例九日每日遣官部大臣輪告各宮廟既而命吏部尚書嚴訥禮部尚書李春芳督察諸執事官不虔者

救日月食

救日月食行禮

洪武初定其日皇帝常服不御正殿中書省設香案百官朝服行禮鼓人伐鼓復圓乃止若月食大都督府設

香案百官朝服不伐鼓雨雪風翳則免

洪武二十六年三月更定救日食儀禮部設香案於露臺上向日設金鼓於儀門內設樂於露臺下設拜位於露臺上下至期百官朝服入班樂作四拜興樂止跪執事者捧鼓班首擊鼓三聲衆鼓齊鳴候復圓四拜興樂止禮畢月食則百官便服於都督府救護如儀在外諸司日食於布政使司府州縣月食於都指揮衛所禮亦如儀從之

救日食

洪武五年禮部奏定救日食禮儀其日皇帝常服不御正殿中書省設香案百官朝服序立行禮鼓人伐鼓復圖乃止若月食大都督府設香案百官常服序立行禮不伐鼓若遇雨雪雲翳則免行禮從之

日當食不食

正統六年正月行在禮部尚書胡濙奏本年正月朔午朔日當食皇上敬謹天戒預勅羣臣救護如制至期

天氣清明太陽正中無纖毫之虧此蓋皇上至仁大德下及於民上格於天是以當食不食禮宜慶賀上曰此是上天垂眷君臣當益加敬慎不可怠忽慶賀禮免行

救月食

弘治十六年欽天監奏弘治十六年二月十五日夜墜月當食一分二十秒回回厯推算則不食緣所食數少請待臨期觀候免百官行救護禮部言不救護恐臨時日月食有驗反為失誤上命仍如例救護

齋醮

資薦亡歿將

永樂七年命禮部遣僧於靈壁白溝東昌真定夾河崇城等處修齋各三晝夜資薦奉天靖難將士之亡歿者

建齋資福

洪熙元年冬至節近命禮部集僧道於慶壽海印能仁三寺及靈濟宮各建薦揚大齋七晝夜資皇考妣之福齋醮不許百官行香

成化三年禮科都給事中張寧等奏釋道之教三代所
無至漢唐而盛歷代英君誼辟非不深惡而痛革之特
以化導愚昧存之以備治外之一術耳非為其能扶世
立教延永國祚而為之崇奉也皇太后誕日建設齋醮
乃會百官炷香赴壇行禮則是儒者自失其守矣夫臣
之於君願其福也當勸以修德善願其壽也當勸以去
逸欲今乃不能盡所當為以辦香尺楮列名其上宣揚
於木偶之前相率而拜曰為朝廷祈福祝壽通朝之人

靡不相從不能闢而排之又不能以正自處天下後世
謂何英廟初即位屬有足疾其時一二大臣不察古人
行禱之意故常舉行此事蓋出於一時臣子迫切之情
祖宗之舊典先帝之本心因循至今尚沿故習大臣之
於君猶子之於父一指一髮皆其長養使齋醮可以助
國殺身亦所不辭但以無益事情徒傷大體其於聖孝
不無少損乞勅禮部凡遇齋醮不許百官於寺觀炷香
行禮其僧道坐食無所劾勞自願焚修以為盡心者聽

如此庶可以扶名教全治體而與三代之時並隆矣上
曰爾等所言有理今後僧道齋醮不許百官行香

酌行齋醮

弘治十一年禮部覆奏府部等衙門所言止齋醮事以
為齋醮祈禱之說皆近日傳奉真人佛子等倡導所為
今後萬壽聖節及太皇太后皇太后聖旦并春祈秋報
仍舊其餘並行停止從之

禁僧道寅緣齋醮

弘治十八年禮部尚書張昇等言大行皇帝賓天宮殿門禁正當嚴肅以譏察出入辨別內外正禮之不可緩者近聞真人陳應禡西番灌頂大國師那卜堅叅及班丹羅竹等各率其徒假以袂除薦揚數入乾清宮几筵前肆無避忌京師傳聞無不駭愕請執應禡等置於法革其名號追奪印誥及累年所得賞賜仍照例黜逐發遣上曰卿等所言是應禡等姑免逮問所冒職事封號俱查革印誥并所賜玉帶送所司交納今後僧

道敢有黃緣出入宮禁濫設齋醮者并引誘之人俱罪
不宥於是禮部會吏部議應循等十一人革真人高士
帶左正一等御那卜堅叅等六人革灌頂大國師帶禪
師銜俱開住僧錄司存留左善世定鎧等道錄司存留
左正一柏尚寬等各八員如原額其左闡教法旺等十
七人右玄義李元縞等二人亦革任門住從之

祈禱在修已

嘉靖十年欽安殿啟建祈嗣醮事禮部左侍郎湛若水

言陛下以皇儲未建精禋祈禱求之於神者至矣臣愚
以為又當修其在已者以協應之所謂在已者收斂精
神是矣夫二氣儲精而神生焉精神者天地斂之以生
成萬物聖人斂之以盛德而成大業是故斂之則全用
之則散目多視五色則散於五色耳多聽五聲則散於
五聲心多役百為則散於百為是以聖帝明王以耳目
股肱之用托之於五臣而使翼為明聽焉誠願陛下凝
神定慮不役精於耳目不勞神於思為以為生育之本

上曰爾既欲朕收斂精神便不必如此煩擾

請因齋醮推恩

嘉靖十年禮部主事田汝成言皇上以青宮久虛祈天
建醮復普放生之仁凡羈蹄鍛翮集在上林者咸得翔
空走野而顧使囹圄之徒久繫徽纆至於衣冠之倫以
狂謬觸諱流竄荒裔父子不得相顧離披隕穫魂喪魄
存凡此皆陛下之赤子也伏望大擴仁恩軫念孺獨勅
下法曹如熱審例盡錄罪人因其輕重或即縱歸或從

未減而謫戍者亦當分別情罪或賜生還或徙近地則
明詔一出萬姓歡騰而和氣氤氲羣祥悉集矣上以汝
成職非言官率意妄奏切責而宥之仍奪俸二月

歷日備考

進歷

詳定大統歷

吳元年十月乙未是日太史院進戊申歲大統歷先是
本院會大常司議進歷儀宋以每歲十月朔明堂設仗

如朝會儀受來歲新厯頒之郡縣今擬先冬至一日中書省臣同太史院使以進厯聞至日黎明上御正殿百官朝服侍班執事者設奏案於丹墀之中太史院官具公服院使用盤袂捧厯從正門入屬官從西門入院使以厯置案上與屬官序立皆再拜院使捧厯由東階陞自殿東門入至御前跪進上受厯訖院使興復位皆再拜禮畢乃頒之中外至是如儀行之既而上召御史中丞兼太史院使劉基謂曰如古者以季冬頒來歲之厯

似為太遲今於冬至亦為未宜明年以後皆以十月朔
進初戊申厯成將入梓基與其屬高翼以所錄本進上
覽之謂基曰此衆人之為予基曰是臣二人詳定上曰
厯數者國之大事帝王敬天勤民之本也天象之行有
遲速古今厯法有疎密苟不得其要不能無差春秋之
時鄭國為一辭命必裨謔草創世叔討論子羽修飾子
產潤色然後用之故少有闕失辭命尚如此而況於造
厯乎卿等推步須各盡其心必求至當基等頓首而退

乃復以所錄再加詳較而後刊之

頒歷

直省頒歷不同

洪武六年命禮部自今頒歷惟直隸府州及北平陝西
二行省則欽天印造頒給之其餘皆令依式印造給與
所屬每歲仍以十月朔日進歷朕於奉天殿受之頒於
百官

免歷日工本錢

洪武十五年詔免厯日工本錢初頒厯民間有司例徵工本錢至是上聞之諭禮部臣曰頒厯授時君職也而又徵歛民財豈為上之道哉亟罷勿徵

頒厯定在月初

嘉靖七年十一月庚子朔頒明年大統厯禮部左侍郎季時言頒厯必於十一月朔今值冬至慶賀乞於十五日頒給上曰頒厯在月初合古天子頒朔之義翌日非宜當於冬至次日行之

禮部志稿卷八十八

欽定四庫全書

禮部志稿卷八十九

明 俞汝楫 編

欽天備考

考選天文生

成化十五年欽天監奏選官民子弟肄習天文歷法已
歷三年本監據正統年例經奏得旨考中收充天文生
事下禮部查成化六年近例復奏得旨會監官覆考得

一百七十命俱收充天文生食糧辦事退其不中者六人仍留肄習

南京天文生補充例

成化二十二年南京欽天監以南京吏部等衙門會奏天文生陰陽人原額量加二分奏陳本監原奉高皇帝聖旨并引大明律例禮部覆議舊例皆無以女婿外孫義姪別姓充補之今宜行南京禮部仍照近例舉行從之

改造渾儀

弘治十四年欽天監監生吳昊請改造觀象臺原製渾儀及修改簡儀禮部請令監正張紳議謂原製渾儀時未經校勘其黃赤二道相交於奎軫不合今之四正陽經故南北圓軸不合兩極出入地度陰緯而東西窺管又不與太陽出沒相當是以推驗無準從前不用簡儀雖用以測驗然當時鑄印造雲柱頗短小亦稍不合天樞故推測經星去極亦有差謬今改造渾儀宜以赤黃

二道改交於壁軫則與今之四正陽經正相合而圓軸
窺管亦無相合相當者簡儀雲柱則比舊少加高大足
矣禮部覆請令紳等呈木樣以聞至是木樣成禮部議
謂可施之永久且請如吳等所奏移文吏部量請陞授
諸天文生之効勞年深者從之

訪取通歷

弘治十一年十二月欽天監掌監事太常寺少卿吳昊
言天文歷數陰陽之術乃推步觀候及占卜吉凶禍福

所繫苟術業不精則推步有差占候無驗欲行天下訪
取精通天文歷數陰陽地理者起送備用至五星子平
六壬遁甲占課灼龜相面演禽觀梅拆字及範圍大定
等數學有明驗者亦以禮起送禮部覆議宜從所奏其
觀梅拆字演禽相命前定數六壬課占灼龜等末技無
益於用不許妄舉上曰六壬占課灼龜果有精通者亦
訪取之

停天丈生科舉例

嘉靖元年欽天監副韓昂奏乞令如天順間例應科舉禮部議太祖著令欽天監人員別習他業不學天文歷數者俱發海南充軍明例不可違上是之

考補欽天監官生

嘉靖十一年禮部議上考補欽天監官生事例

一遇有官生缺役許送嫡派子孫年終類考果藝術精通收役食糧若頑鈍無成即將本戶子弟考居優等者以次收補或無以次人丁候本生習學再考

一擇官生子弟性質聰慧者分派各科嚴立教條按季考試本部委官一人會同提督歲終送部類奏

一今後天文等科遇有八九品官員缺以本科人役食糧十年以上者送部考選

一近者天文陰陽分為兩途而刻漏子弟不得推補堂官請以後監副員缺不分天文漏刻科分但有歷俸年深者皆得奏請簡用其六品七品以八品考補保章挈壺以司晨司歷博士考補司晨司歷博士與各科專業

人役考補

一間者添注之官等於舊額又皆作為定員因仍銓補故多漏刻博士二人靈臺即一人皆當裁罷詔可

監籍子弟科舉并錄用

天順元年掌欽天監事禮部右侍郎湯序奏言兩京天文生陰陽人及官生戶下子弟能讀儒書習三場文字者遠離鄉土不能回還宜令就兩京報名科舉有中式者依資格出身其天文生陰陽人仍於本監錄用戶下

子弟果有能習天文歷數者聽從本監奏保錄用下禮部議行

訪舉通術數人

天順二年掌欽天監事禮部左侍郎湯序言永樂中嘗博收天下術數天文流為數世之用迄今年久凋殘殆盡占候缺人請詔內外有司凡精通天文歷數地理課命之術者不分軍民起送赴京或避罪亡匿之人亦免罪送監量材奏請擢用知而不舉及舉而非人者悉治

其罪事下禮部議宜從其奏通行訪舉如通一事以上
灼有應驗者封識書籍連人遣詣京師不許徇名違實
槩行濫舉其妄言禍福違理亂衆者有司嚴為禁約以
杜奸宄從之

大醫備考

取補事故醫士

正統五年禮部奏太醫院醫士事故者一百五十五
人已嘗奏請移文浙江等布政使直隸府州取補應役

今經二年之上十無一二至者以致乏醫應用欲行巡按監察御史嚴督催促赴京應用若有司徇情受囑縱容託故者拏問如律上可其奏

嚴醫學考試

弘治四年十一月戊寅禮部議覆太醫院院判劉文泰之奏請命太醫院精選年二十以下十五以上官生子弟送審本部發本院分撥各館習學仍推素讀儒書精醫業者不分有無官職或三人或二人教之本院堂上

官相兼提督四季考其怠惰者責罰仍定三年一考五年三考俱令本院堂上官一員擇取醫官二員率子弟赴禮部公同出題考試果通醫業准充醫士否則發回本院聽習一年再試三試不中黜退寧家其子弟專令習醫業不許營求科舉以二其心若五年考試并前成材者多其教師無官者奏請量陞一職有官者量加旌擢從之

行考試教習二法

嘉靖五年禮部尚書桂萼等言古者醫師歲終皆有考覈故術業久而益精今拘於世業按籍收人一入供事永無考較所謂粗工洵洵何以有濟且獨用此一途則天下雖有盧扁倉公無繇自進而國家太醫院永為此輩巢窟臣請擇醫士可教者設程限使誦習其業一歲三試有成材則會太醫院官列為三等上者入御藥房已入者准與授職中者授官帶辦事本院已冠帶者與之俸給下者應役本院如故或良醫大使有缺中下者

得赴吏部銓補其不係世業精通醫術者聽其應試試
高得入籍而汰其世業不通者無令冗食至於見在各
官考滿及考察皆聽臣等課其醫業送吏部斟酌黜陟
上以為醫道人命所關命醫士考選去留及收考在外
人役皆如部議餘仍舊規行於是芻等復言有考試而
無教習則業無傳授事竟因循見在各官冗濫尤甚宜
并加考選奏請去留且考滿考察之議無非欲其警惕
以圖後效上乃悉從之

定考核轉送法

嘉靖二十二年禮部奏太醫院官自御醫吏目以下考滿丁憂俱繇本部查明轉送吏部如欽天監例報可已太醫院爭非舊制下禮部議御醫吏目等官原額不滿三十近年因事陞授增浮數倍率皆不諳方書虛糜官廩良田考核之法不嚴以致賢否莫知僥冒滋甚耳必繇查送庶可以杜倖階一法制請如前命從之

覈醫士醫生違覈

嘉靖二十八年禮部尚書徐階叅奏內殿供事醫士吳夢龍等不繇本部考選夤緣收用輒又曠違職役私回原籍請究治因言聖濟殿供事人役本部先年題准三年一次考選自十八年以後考試之法不行而內殿供奉之醫間有乞恩傳補而入者夫考補醫士猶恐不勝供奉內殿可徒徇其陳乞而不論其術業乎請自今為始本部年終通將該院醫士醫生嚴加考試分為三等一等者留候聖殿缺人送入供事其餘悉遵舊制仍令

太醫院堂上官協心鈐束官醫不許違曠職業其有逃
回患病日久不供役者每季呈報查處得旨夢龍等悉
革役為民近年禮部違例濫收各項人役大壞政體卿
將醫士并儒士通事但係未經題請考試假以訪保習
學為名及有罪過冒收者通覈具奏已階查叅太醫院
未經考試醫士侯時泰等二十四人鑄印局未經考試
儒士石同堅等二十六人四夷館曠役通士陳嘉謨等
二人詔革役問罪有差

查覈冒濫

嘉靖四十三年禮部奏上請查太醫院冒濫官生應除
名者四十二人應除戶者一百六十二人因言令甲醫
士俱以父祖世業代補或在外訪保醫官醫士以充其
已收在院者仍有教習考選陞黜之例蓋祖宗慎重醫
學如此後因夤緣干進者多舉保收充日濫遂將前例
一切停止自今清查之後請將本院醫籍新生幼丁每
三年保結報冊其餘並不得私收一人其見在子弟及

寄籍候補醫丁見有父祖收充年月世次可憑者悉聽本部委官教習仍按月按季考試一次不到者量責二次除名三次除戶年終同槩院醫士生送部考試量加賞罰三考大考分三等一等補醫士二等補醫生三等發院習學又三年再考新補照舊役一體甄敘二次不堪收補者發為民納銀吏目必經三年類考一等方准同在院醫士遇缺考送銓選納銀冠帶例該收考醫士亦必經三年類考方准挨次撥差其槩院醫士年終歲

考醫業無成者量責或住支月糧三年大考一等原係
醫士無冠帶者給冠帶原在內殿供事者陞俸一級俱
各候內殿缺人該院於各科內挨次呈部收補二等原
係醫生與充醫士食糧原係醫士無冠帶者給冠帶原
在內殿者不准供事三等原有冠帶者不准冠帶原支
品級俸者降俸一級支襍職俸者降充冠帶醫士食糧
七斗醫士降醫士醫生住支月糧俱聽習學半年送部
再考如有進益仍給俸如故再不通俱降醫生發回該

院專供剉碾之役其御醫吏目員缺將原在內殿供事
及考居一等諸員御醫於吏目內已經九年考滿者吏
目與醫士於內殿供事六年司禮監三大營及刑部會
同館當差九年者送部再考銓補良醫大使員缺於二
等內考補如年資未及或術業平常則寧虛缺不補荒
疎太甚者叅奏革黜及起送補差回補考等項俱照節
年事例以實舉行其承行官吏有詭法作弊者從重究
治得旨先行

僧道備考

僧道禁令

洪武中僧道不務祖風及俗人行瑜珈法稱火居者有禁即揭榜申明違者殺不赦

洪武十六年定天下僧道府不過四十人州不過三十人縣不過二十人

洪武二十四年令佛經番譯已定者不許增減辭語道士設醮亦不許奏青詞各遵頒降科儀民有效瑜珈法

稱為善友假張真人名私造符錄者重罪

洪武二十四年令清理釋道二家凡各府州縣寺觀但存寬大一所併居之不許雜處於外違者重罪親故相隱者流願還俗者聽還

今天下僧道有牒立庵堂寺觀非舊額者悉毀之

洪武二十七年令榜示天下毋得私牒庵堂僧道有妻妾者許諸人趕逐亦不得收民間兒童為僧

永樂十年諭禮部天下多不守戒律民間修齋誦經無

誠心甚至飲酒食肉遊蕩荒淫又有無知愚民妄稱道人鼓惑男女雜處無別敗壞風化悉禁之

宣德七年三月申嚴僧人化緣之禁上謂都御史顧佐曰佛本化人為善今僧人多不守戒律務祖風往往以創寺為名羣昇佛像遍歷州郡化緣所得財物皆非禮耗費其申明洪武中禁令違者必罪之

嘉靖十四年大興隆寺燬永不復并大慈恩寺俱革凡真人名號洪武中革前代所稱天師止稱正一人

隆慶二年勒令繳納真人府印止承襲上清觀提點

罷度牒錢

洪武五年給僧道度牒時天下僧尼道士女冠五萬七千二百餘人皆給度牒以防偽濫禮部言前代之給度牒皆計名鬻錢以資國用號免丁錢詔罷之著為令

僧道銓補例

洪武十五年定各寺觀住持有缺從僧道官舉有戒行通經典者送僧錄司道錄司考中具申禮部奏聞方許

州縣僧道未有度牒者亦從本官申送如前考試禮部
類奏出給

三年一次給牒

洪武十七年禮部尚書趙瑁言自設置僧道二司未及
三年天下僧道已二萬九百五十四人今來者益多其
實假此以避有司差役請三年一次出給度牒且嚴加
考試庶革其弊從之

榜示僧道禁約

洪武二十七年正月命禮部榜示天下僧道觀凡歸併
大祀設砧基道人一人以主差稅每大觀道士編成班
次每班一年高者率之餘僧道俱不許奔走於外及交
構有司以書策稱為題疏強求人財其一二人於崇山
深谷修禪及學全真者聽三四人勿許仍毋得創庵堂
若遊方問道必自備道里費毋索取於民民亦毋得輒
自侮慢凡所至僧寺必揭周知冊以驗其實不同者獲
送有司僧道有妻妾者諸人許捶逐相容隱者罪之願

還俗者聽亦不許收民兒童為僧違者併兒童父母皆坐以罪年二十以上願為僧者亦須父母具告有司奏聞方許三年後赴京考試通經典者始給度牒不通者杖為民有稱白蓮靈寶大居及僧道不務祖風妄為議論沮令者治重罪

黜僧道不通經典

洪武二十八年己未禮部言今天下僧道數多皆不務本教宜令赴京考試不通經典者黜之詔從其言年六

十以上者免試

清理寺觀

永樂元年命禮部清理釋道二教凡歷代以來若漢晉唐宋金元及本朝洪武十五年以前寺觀有名額者不必歸併其新創者悉歸併如舊

違禁請度僧編戍

永樂五年正月直隸及浙江諸郡軍民子弟私披剃為僧赴京冒請度牒者千八百餘人禮部以聞上怒甚曰

皇考之制民年四十以上始聽出家今犯此禁此是不
知有朝廷矣令悉付兵部編軍籍發戍遼東甘肅又嘆
曰朕承遵舊制一不敢忽下尚縱肆如此何況後來此
不可宥且此輩皆民螟螣不可蕃育

私剃遣發輸作

永樂六年六月命禮部移文中外凡軍民子弟僮奴自
削髮為僧者并其父兄送京師發五臺山輸作異日就
北京為民種田及盧龍牧馬寺主僧擅容留者亦發北

京為民種田

榜示僧尼禁

永樂十五年禁僧尼私建庵院上以洪武年間天下寺院皆已歸併近有不務祖風者仍於僻處私建庵院僧尼混處屢犯憲章乃命禮部榜示天下俾守清規違者必誅

僧道服制

永樂十六年上以天下僧道多不通經典而私簪剃敗

辱教門命禮部定通制今後願為僧道者府不過四十人州不過三十人縣不過二十人限年十四以上二十以下父母皆允方許陳告有司行鄰里保勘無礙然後得投寺觀從師受業俟五年後諸經習熟然後赴僧錄道錄司考試果諳經典始立法名給與度牒不通者罷還為民若童子與父母不願及有祖父母父母無他子孫侍養者皆不許出家有年三十四十以上先曾出家而還俗及亡命黥刺者亦不許出家若寺觀住持不檢

察而容留者罪之仍命禮部諭天下

不崇佛事

宣德四年四月慶壽寺僧志了奏城西故有萬安寺久廢請化緣於民重作之上諭行在禮部尚書胡濙曰化緣者巧取誑奪以蠹吾民不可聽

宣德六年五月行在工部尚書吳中言昨山西代州圓果寺奏本寺是古跡道場為國祝釐之所舊塔損壞乞役為之上曰卿欲藉此永福乎朕以安民為福其止之

勿勞吾民

宣德六年九月行在戶部言宛平縣民以果園地施崇國寺請蠲其稅上曰民地衣食之資乃以賜僧又求免稅甚無謂令亟以還民

宣德九年十二月有僧自陳欲化緣修寺祝延聖壽者上斥之既朝罷顧謂侍臣曰人情莫不欲壽古之人君若商中宗高宗祖甲周文王皆享國綿遠其時豈有僧道豈有神仙之說秦皇漢武求神仙梁武事佛宋徽宗

好道效驗可見矣世之人終不悟甚可嘆也

復造冊查牒法

正統二年行在禮部尚書胡濙等奏洪武間天下僧道給過度牒者令僧錄司道錄司造冊頒行天下寺觀凡遇僧道即與對冊其父兄貫籍告度月日如有不同即為偽冒迨今年久前令寢廢有忘歿遺留度牒未經銷繳為他人有者逃匿軍民及囚犯偽造者有盜賣影射及私自簪剃者姦弊百端真偽莫辨乞自今以後給度

牒者仍造冊頒行天下寺觀以防奸詐從之

依欽定額數給度

正統五年進士張諫言僧道之數已有定額近因希求請給數千百衆奄至京師非寄跡寺觀即潛住民間黃冠緇衣布滿街市究其所學無益於國而所食悉出於農且今饑饉之年尤宜痛加裁抑甚者其中亦有犯姦及為盜賊者耗損民財傷敗風化莫此為甚乞令錦衣衛五城兵馬司挨查除原隸在京寺觀者仍舊存留其

餘悉令勒回本土如是雖不能遽弭天變而亦可以少
甦民困矣事下禮部議僧道依太宗欽定額數給度其
恃頑潛隱民間者并罪窩家從之

建言黜佛寺

正統十四年禮部聽選知縣單宇言佛本夷教前代事
之俱致禍亂近年以來修蓋寺觀徧滿京師男女出家
累千百萬不事耕織蠹食於民所以世風壞而人心惑
也況所費木石銅鐵不可勝計以有用之財為無用之

費請拆其木石改造軍衛銷其銅鐵以備兵仗遣其僧尼還俗生理庶幾皇風清穆異教不行矣事下所司

罪納賄度僧

景泰三年治僧錄司右善世南浦等納賄度僧之罪時天下僧童數萬赴京度有詔兩京各度一千名各府四十名各州三十名縣二十名不必查勘稽留左闡教清讓等令各僧童拈鬪定數逼取銀萬餘兩事覺命法司擒治南浦等分授其銀欲為掩護朦朧奏乞將天下

僧童普度以息爭訟於是六科給事中十三道御史劾奏南浦等奸欺四罪禮部奏乞雲南土僧不給度僧錄司却奏欲給度取利肥己致蒙允許一也戶部奏准令僧童運米實邊僧童情愿報効僧錄司却奏稱其艱難致蒙免運二也給事中陳嘉猷奏准依舊制查考各僧投文應試僧錄司不肯遵依回申並無一僧投文奏蒙免考三也恐訐出奸弊奏要普度暗要人心四也夫前次令其運米則云行童艱難今收度乃得銀鉅萬前次

要行查則云無僧今給度則稱一縣有一百餘名八九
十名臣等看得南浦等間閭小輩無賴奸人曩祝髮以
為僧實逃名而避役不耕不蠶而衣食實四體之不勤
不忠不孝而生存誠三綱之莫究飲酒茹葷全無忌憚
貪財縱欲略不慚惶俱宜擒送法司明正其罪時禮部
尚書胡濙等亦奏各僧官累次進本煩瀆其欲普度者
特設計為規利之媒其言爭訟者特欺詞為文奸之術
雖名清淨穢濁無倫惟號慈悲貪饕無厭況所收之人

但取銀物或假張作李或稱老為少或縱容軍囚竈站
濫及遊手白丁或人不到而借倩代替或捏虛名而貨
買與人欺君玩法律所難容命法司悉擒治

審覈收度

景泰六年命禮部移文天下今後僧道務要本戶丁多
本人持行修潔不係軍匠鹽灶等籍里老保結呈縣覆
實具申府司類呈該部方許收度如有扶捏詐冒不實
者巡按御史按察司將本人并保送僉書吏一體治罪

仍勘本寺觀原定額數如有不及給與度牒如有數多
不與出給從巡按河南監察御史程亨言也

僧牒賑饑

成化元年命禮部給度牒鬻僧以賑饑民巡撫淮揚都
御史林聰處一萬每名納米一十石南京禮部五千每
名納米十五石其各處僧見在京師者每名納銀五兩
從監察御史焦顯給事中侯祥南京守備官議請也

止度牒濟賑例

成化八年五月總督漕運兼巡撫淮揚左僉都御史張鵬奏請給僧道空名度牒一萬道鬻米濟荒禮部尚書鄒幹言成化二年已度僧道一十三萬有奇今未及十年不宜更啟其端上曰僧道給度不宜太濫且鬻米之數其得幾何而所損於國者多矣其在官吏監生尚不可以為常況此輩乎勿許

九月癸巳禮部奏巡撫山東右僉都御史牟俸以山東旱災奏乞給空名牒十萬度僧道取銀以助賑濟戶部

奏行本部出給緣僧道例必十年一度自天順元年至
成化二年已度一十二萬二千二百餘人今若先期特
度於山東則僧道行童必羣聚其地反為搔擾詔不必
行

禁遊僧

成化十四年命禁約遊僧監察御史陳鼎奏自成化二
年起至十二年共度僧道一十四萬五千餘人而私造
度牒者尚未知其數此輩遊食天下姦盜詐偽靡所不

為使不早為處置大則嘯山林謀為不軌小則興妖言
扇惑人心為患非細今蘇州等處累獲強盜多係僧人
乞敕所司禁約禮部覆奏命通天下禁之

照年例起送給度

成化二十年禮部奏舊例十年一次給度天下僧道今
成化二十二年給度在邇除兩京并鳳陽大龍興寺大
嶽太和山龍虎山僧道至期別議宜令天下有司查勘
本處額設寺觀及見在僧道如額數不足方許起送務

加詳審如例仍令按監察御史嚴督毋得冒濫且令各處亢陽為虐來年米價必至騰涌若今僧道羣聚於京恐有意外之虞或暫停止令有司毋輒起送以俟豐年尤便有旨額數不足者還照年例起送給度不許冒濫其如所奏禁之

預度賑荒

成化二十年十二月乙卯預度天下僧道六萬人時山西陝西饑許江浙等處願為僧道者輸粟賑濟給以度

牒已萬人矣戶部言陝西饑尤甚乞再度六萬人各輸銀十二兩下禮部覆奏僧道十年一度宜以前後所度七萬准後二十二年該度之數仍令天下有司照數類送從之七月禮部言成化十二年度過天下僧道一萬三千三百四人近陝西山西饑荒已預度七萬人銀一十二兩准作二十二年該度之數視前加至數倍恐各處僧道行童仍前行來京貢緣囑託乞行沿途闕津嚴加盤詰而在京巡街御史嚴督五城兵馬察捕照如所

奏但不許一槩溷逐

該度年例酌處

成化二十一年禮部奏成化二十二年例該度僧道兩
京神樂觀該度道童計五百十六人近因山西陝西救
荒預度七萬人准作改度之數而兩神樂觀止度一百
六十人數實不足臨期恐難再請而僧道錄司亦稱在
京寺觀俱無田糧銀無所措宜移山陝所遺空牒六千
均之兩京及天下名山兩神樂觀共增以六百五十人

俱免納糧餘皆分與僧道錄司及鳳陽大龍興寺五臺
太和龍虎三茅四大山銀已納解部未納減作五兩制
可銀未納者俱免之

禮部請行給度僧道七萬定數於天下大率僧不過五
萬人道二萬人如道數不足即補以僧僧道錄官無得
紛擾兩京神樂觀并僧道錄司及天下名山七千八百
人十三布政司共五萬二千人浙江湖廣江西四川山
東河南山西陝西各五千貴州一千雲南二千廣東廣

西福建各三千南直隸共六千九百蘇州七百應天常
州松江鳳陽揚州淮安各五百鎮江徽州寧國廬州安
慶各四百太平池州各三百廣德州二百徐州滁州各
一百五十和州一百北直隸共三千三百順天真定各
五百河間保定永平各四百大名順宣廣各三百五十
隆慶州五十詔可

懲戒張真人

弘治八年禮部會奏內一條懲戒邪惡真人張元慶乃

極刑罪人元吉之子法應流竄冒得襲封世濟其惡穢
德昭彰神人共怒是以上天降罰其龍虎山殿宇焚燬
殆盡請免其來朝以杜請託之路并勘其罪惡實跡及
違制妄造符錄請給道童等情加以重罰仍訪取本族
素有戒行者嗣守其業

停十年一度會

弘治九年禮科給事中彭城等奏舊制僧道各有定額
府不過四十人州不過三十人縣不過二十人槩天下

計之其請給者亦不過三萬六千餘名陛下即位之初凡左道亂正敗俗傷化之人一切屏斥天下臣民以為太平盛德之事復見於今日茲者當十年開度之期各處僧道將復請給臣等查得成化二年給度過僧道十三萬二千二百餘名成化十二年一萬三千三百餘名成化二十二年二萬四千五百餘名前此給度又不知其幾何比之舊額已為十倍況今四方災異流行饑饉薦至若不預為禁約恐遠近效尤為患非細乞敕該部

查照舊額將十年一度事例特賜停止通行各處巡按等官清查寺觀見在僧道行童除已度者不必追奪未度者額外不許存留悉令還俗候正額有缺方許起送赴部考選給度違者仍照先年充軍事例發遣南京福建道監察御史洪遠等亦以為言俱下所司知之

五月南京大龍興寺左覺義發直等奏請起送行童給度禮部勘其啟釁開端故違成命請寘之法上曰僧道雖額過多但自弘治年來未嘗給度爾等其議處停當

以聞不許仍前過濫禮科給事中屈伸極論之工科都
給事中柴昇亦請勿度僧道俱下其奏於所司禮部議
處給度僧道事宜謂我朝給度舊制甚嚴額數不足則
照缺度補無則止誠以此輩蠶食生民姦偽無所不至
若不痛加裁抑其弊將無紀極弘治年間人民方免兵
革僧道尚少故太祖皇帝有三年一給度之制以後日
漸增多故太祖皇帝改為五年一度天順二年因冒濫
益甚英宗皇帝復改為十年一度皆斟酌多寡因時制

宜初無一定之制況三年所度止三五百人則三十年
不過三五千人五年所度止一萬人則五十年不過十
萬而止使此制常行則額數必不過濫皇上曩因左都
御史馬文升之言停十年一度之例後因本部之請復
有預止來京之禁乃者謂自初元以來未經開度方興
允給之念即有過濫之戒仁義並行雖古之聖帝明王
曷能遠過伏望仍鑒累朝禁約敕旨今次所度名數特
賜裁抑或俯從臣等之請定為經久之計自後或二十

年二十五年一次開度當度之年照例施行庶僧道可漸復額內之制而百姓不胥為緇黃之歸矣上從之在京准度八千名南京五千名直隸及各布政司府州縣原額有缺照數保送來京仍令禮部會官審驗考試非齋有明文及實能背誦本教經典不准收度有扶同作弊致冒濫者必罪不宥

命女冠還俗

宣德四年六月順天府真元觀女冠成志賢等九人請

給度牒禮部言太宗皇帝時命尼僧皆還俗今成志賢等亦宜遣還父母家上命遵先朝令仍嚴女婦出家之禁

欽依禁革尼僧

嘉靖二十二年六月禮部題稱尼僧本以女流托名戒行晝掩外門夜閉門戶實為風俗治道之累合行五城曉諭禁約等因節奉聖旨卿等說的是尼僧庵寺數多男女混雜有傷風俗依擬禁約欽此又查本年十二月

內節奉聖諭禮部奏將尼姑庵院查毀朕思此輩委傷風化著盡行拆毀又查得嘉靖十六年三月南京守備太監潘真等題稱尼姑俱係良家子女敗壞風俗等因該本部議擬合行彼處五城禁革奉聖旨是欽此俱經通行欽遵去後但日久人玩前弊復生近訪得尼僧仍復潛聚京師或私置房屋或投託親知誘引良家婦女恣肆多端不可枚舉若不申明先年諭旨嚴加禁革則縱慾導淫傷風敗俗愈甚而不可制除行據五城兵馬指

揮司許榜等各呈稱尼僧真實等共約三百名及近據
錦衣衛舍餘劉瓚亦奏前事本部看得在京尼僧委的
縱肆奸淫斃傷風化誠為可惡仰惟我皇上臨御以來
敦化立教崇正闢邪天下嚮風固已翕然成俗矣伏見
近日撤除番寺欽奉聖諭爾等遵行弗得黨邪穢正臣
等仰嘆大聖人所為真足以超邁百王垂訓萬世也臣
等恭司邦禮敢不仰贊休德竊照前項尼僧外假清戒
以惑愚民內實淫姦以壞名節節經本部題奉欽依禁

革還俗而依然尚存蔑視無忌真為世道民風之累合
候命下移咨都察院轉行五城巡視衙門嚴加曉諭禁
約責令蓄髮還俗及咨南部禮部并通行南北直隸各
省撫按官一體禁革其私勑尼姑庵院不拘在京在外
未拆毀者通行查出拆毀其有私置房產投託親知誘
引非為者在京聽緝事衙門訪獲究治在外聽撫按官
究查及照舊存尼姑院本為匱乏不給并老髦無歸者
居住今訪得年少尼僧亦有潛匿其間者合并行該城

巡視衙門督令兵馬司清查名口若干貧老者照舊按
挿毋行引度以敗風俗年少者隨令還俗嫁配及不許
仍前藏匿別處違者許地方并兩隣首告再查有等遊
方僧人等項常在街市沿門持鉢化緣或多係奸細之
徒假以為繇卒未可辦合行五城地方盡行逐去奉聖
旨依擬著實舉行有不遵奉的著緝事衙門巡城御史
訪拏重治欽此

私自簪剃禁約

嘉靖十年閏六月禮部題該監生萬民奏稱天下軍民
逃避差役却乃私自簪剃投入寺院為僧道乞要立法
但有一童私自簪剃全戶連坐等因本部議擬通行緝
事衙門巡視御史轉行該各府州縣嚴加禁約寺觀不
許仍收行童私自簪剃寄名出家逃避差役如有私剃
寺觀庵院即與拆毀入官亦不許與人修齋設醮并奏
青詞燃點天燈等項仍照依近奉敕諭事理僧道除正
額府不過四十名州不過三十名縣不過二十名外其

餘有度牒者化正還俗無度牒查革為民當差仍具化
革過及有無緣繇巡按御史奏報查考等因奉聖旨這
僧尼已有勅諭著行各府州縣化正還俗別著行撫按
官查考具奏餘依擬通行禁約欽此

裁革真人名號

隆慶二年詔革正一真人名號奪其印張氏自東漢建
武中張道陵以修煉符水術起傳數世有張魯者即史
稱五斗米賊也號能攝役鬼物愚民神而事之魯之子

元忠即道陵煉丹處設壇授法唐會昌間始賜名真仙
觀宋大忠祥符間王欽若奏改為上清觀元至正中賜
號正一教主真人主領符錄事國朝因令承襲傳至嗣
孫張永緒以淫縱聞衎益哀永緒死無嗣江西守臣因
言張職名賜印不在典制且復隱稅逃役公行吞噬無
功於世有害於民宜永為裁革禮部覆言請革其封號
止以喬孫張國祥為上清觀提點鑄給提點印上從之

處尼僧寺

嘉靖六年十二月禮部尚書方獻夫等言僧尼道姑有傷風化欲將見在者發回改嫁以廣生聚年老者量給養贍依親居住其庵寺拆毀變賣敕賜尊經護勅等項追奪戒諭勲戚之家不得私度詔悉如其言獻夫復言皇姑寺係祖宗敕建宜留之以安緝年老無依尼僧道姑上曰變賣庵寺如議行年老而貧者量給銀贍養各聽其父兄親黨收之不必處之皇姑寺上復諭獻夫曰昨霍韜言僧道無度牒者其令有司盡為查革自今永

不開度及私勅寺院庵觀犯者罪無赦會江西提學副使徐一鳴以拆毀寺院被逮至京獻夫乃與詹事府霍韜少詹事王綰右僉都御史熊浹上疏乞宥一鳴上不悅乃盡發其前後章疏下大學士楊一清等票處因降諭曰尼僧與僧道不同風俗之壞更甚今因尚書桂萼奏禁約尼僧毀其寺宇已行了旨出之後三四日不知何人哀奏兩宮皇伯母差人諭朕曰皇姑寺乃孝宗朝所建似不可毀吾心不安尼僧逐日無處安身皇帝可

遵吾言聖母亦差人諭朕曰聞皇帝有旨著拆毀尼寺
吾甚不安其皇姑寺聞是孝宗時所建且其中佛像多
若毀之恐不可尼僧逐出也無處安身可不必拆朕謹
聽訖未對意以為必是愚頑小人進以禍福之言故兩
宮皇太后一時傳諭隨即令回奏伯母云適奉慈諭以
奉禁治尼僧事宜欲將皇姑寺留下以稱伯考建造之
意姪敢不將順但尼僧有傷治化且於伊教有玷況此
寺雖有皇伯考賜與勅建原非我皇伯考聖意所為不

過請乞之耳今已令查處伏請聖慈鑒之安心勿慮而
又差人回奏聖母同前次日該朝聖母又諭朕云昨說
拆寺一事恐不可動其中佛像作何處置況昭聖皇太
后有諭皇帝何不從之吾今也要建一座寺或將此寺
與我亦好朕聞即面奏曰近日因禮部臣奏要禁僧尼
寺已從其請兩宮尊諭予敢不奉行但尼僧甚壞風俗
若不先將皇姑寺首毀之餘難禁約伏望聖母勿聽非
人之言禍與福惟天降之惟人所召豈釋道所能干乎

有一等愚人深信故以惑奏予亦聞之兩宮慈訓皇帝不遵是為不孝反依外臣之言惟聖母察之聖母云隨皇帝與大臣議行朕退思兩宮尊意只是恐致災也此寺中多皇親內官供給信施而禮部必有請告之者今方獻夫等論救徐一鳴言不罪之請查究黎鑑其一鳴係提調學較之官無人指理此等事乃擅將古建寺觀溷同拆毀咎逐僧道是見為擾害地方巡按坐視回護不得不言又江西比之京師孰重輕京師根本之地江

西寺觀以一鳴拆之為當京師反縱而回護卿等加詳票旨來一清等奏獻夫等疏詞前後矛盾皇上責之甚當但皇姑寺既建自先朝如聖母堅欲留之則姑從而命將禮部本權且如擬存留以全人子承顏順志之意似亦無害上報曰禮部本只管批出庶見崇正之意假四五日間再有諭及見傳旨留之亦未遲也已而上復諭曰前日卿言皇姑寺今日皇伯母又差人諭朕留之朕回奏云既尊訓兩頒宜即順命但懲惡須去本庶免

後患今遵慈訓將此寺房留與無歸尼僧暫住止著終身不許復引此類其我祖宗時所賜勅額追回只可如此伏惟尊鑒蒙允曰若有他安身之地足矣朕併奏聞聖母諭卿知一清等言聖裁允當臣等即當奉行乃擬旨以上上報曰得卿議來旨草深合朕意於朕既不違親又以見崇正闢邪之意一舉而兩得朕又將此寺額名之意併告卿知夫順天保明者是我朝國號言之僧尼之祖能順聖祖奉天開極建國垂統惟皇上命之何

待後日以一妖尼能保大明也哉又云皇姑者尤不好
聽言我皇家之姑也當時原非祖宗本意蓋被羣小傳
說之耳故此寺云勅賜既是官建何不云勅建於此便
可見非我祖宗本意也故朕深嫉之

教坊備考

放例

放教坊樂工

宣德十年三月教坊司樂工三千八百餘人先是勅行

在禮部曰兩京教坊司樂工過多虛費月糧何益於事
其擇堪承應者量留應用凡老病不堪者悉發為民至
是行在禮部具數以聞悉放之



禮部志稿卷八十九